

# «Fracziun dal mez sco labor»

Delegada da la pcd dal Grischun en il Plantahof a Landquart

DA MARTIN CABALZAR / FMR

■ **A la delegada a Landquart ha la pcd analisà las elecziuns naziunalas passadas, infurmà davart ils resultats da la retschertga tar la basa e marcà las posiziuns ed il focus da la partida per l'avegnir.** En ses pled introductiv ha il parsura da la pcd grischuna *Stefan Engler* dà in sguard sin las elecziuns naziunalas ch'han procurà per surpraisas tant sin plaun naziunal sco chantunal. Il spectrum sanester-verd haja en mintga cas gudagnà influenza en il cussegl naziunal. Schebain la populaziun saja effectivamain alura era pronta da prender en cumpra restricziuns persunalas a favur dal clima vegnia probabel pir a sa mussar en connex cun il referendum davart la lescha da CO<sub>2</sub>, di Engler. En mintga cas haja la pcd surmuntà las elecziuns meglier che quai che blers han prognostigà. Malgrà la sperdita dolurusa cunzunt da dus mandats en il cussegl dals chantuns haja la pcd tuttina pudì mantegnair là sia clera predominanza.

## Rinforzà la posiziun dal mez politic

Cun furmar ina fracziun dal mez hajan ins l'intenziun da rinforzar las posiziuns dal spectrum dal center politic cun atgnas posiziuns ed in agen profil e betg mo sa cuntentar cun procurar per maioritads per ils blocs da dretg e sanester. I giaja primarain per tschertgar soluziuns acceptablas per ina maioritad da la populaziun sin las sfidas principalas da noss dis, sco il provediment da vegliadetgna, ils custs da sanadad ed il clima. En quest sen servia la nova fracziun da mez in pau sco «labor e champ da trenament» per eruir sut tge cundiziuns ch'il bloc da mez chattass sustegn ed acceptanza sco partida unida en l'avegnir.

## La dumonda dal C

En quest connex vegnia era discutada la dumonda da l'opportunitad, necessitad u giustificaziun dal C en il num da la partida. Ina discussiun che saja vegnida lantschada sapientivamain dal directori da



Il parsura da la pcd grischuna, cusseglier dals chantuns *Stefan Engler*, ha commentà la situaziun da la partida.

FOTO SOMEDIA

la partida. Avant che consultar las partidas chantunalas veglia la pcd naziunala dentant procurar per ina basa da discussiun pli clera e transparenta che resguarda l'istorgia ed il svilup, e ch'examinechia avantatgs e dischavantatgs d'ina tala midada e quai tant sin la forza politica sco sin l'electorat actual e futur, accentueschia il parsura da la pcd grischuna.

## Cuntanschi per gronda part las finamiras electoralas

En lur analisa electorala vegnan tant il parsura *Stefan Engler* sco il parsura da la cumissiun electorala *Kevin Brunold* a la conclusiun che la pcd grischuna haja cuntanschi per gronda part sias finamiras electoralas. Uschia hajan ins pudì defender cun *Stefan Engler* e *Martin Candinas* senza pli grondas difficultads ils dus mandats da la pcd en il parlament federal. Quai che na saja dentant betg reussi saja d'augmentar l'electorat da partida. En cumparegliaziun cun 2015 saja quel sa sminuì da 16,8% sin 16,4%, quai che

correspondia ad in minus da 3250 vuschs. E quai malgrà ch'ins haja empruvà da mobilisar tants votants sco pussaivel cun trais glistas. Tenor *Brunold* saja la Surselva vinavant ina ferma bastiun da la pcd, ils ultims onns ha la Val Renana dentant acquistà ina posiziun equivalenta. Entant ch'il potenzial saja absorbà en Surselva dettia anc bunas schanzas da s'expander en la Val Renana ch'ha in grond creschament da la populaziun. Pli gronds fastidis ha la pcd da mantegnair sia posiziun en las Vals talianas ed en il Grischun central, quai tant pli sch'ins na dispona betg d'agens candidats.

## Accents principals e novas sfidas

La pcd dal Grischun ha realisà ina retschertga da basa per eruir las prioritads politicas da sias commembras e da ses commembers. Da la respostas da 175 personas resortan ils suandants accents: colonisaziun decentrala e cumbat da la depopulaziun da las vals periferas, provediment decentral da sanadad, vegliadetg-

na e tgira ed ina meglra cumpatibilitad da famiglia e professiun.

Sco ulteriura sfida per la pcd numna Engler il nov sistem d'elecziun dal cussegl grond. I na vegnia betg ad esser simpel d'anflar entaifer curt temp in sistem adattà per il Grischun che satisfa tant a represchentanztas territorias sco da partidas e che resguarda era l'andament istoric, las sentenzias giudizialas e respecta la precisiun matematica.

## La pcd recumonda dus geas ed in na

A la delegada en il Plantahof a Landquart ha la pcd infurmà davart ils projects da votaziun dals 9 da favrer e decidì las parolas sco recumandaziun a votantas e votants.

L'advocat e parlamentari communal da Cuir *Peter Portmann* ha referì davart l'iniziativa dal pievel «Per dapli abitaziuns pajablas». El è vegnì a la conclusiun ch'i dettia en Svizra avunda abitaziuns da locaziun per pretschs supportabels e che la promozion d'abitaziuns socialas vertenta saja sa cumprovada. L'iniziativa sfalsifitgeschia il martgà, limiteschia las libertads economicas e chaschunia bier birocrazia e custs. Ils preschents suondan unanimamain sia recumandaziun.

Cun in gea unanim suonda la radunanza percurter la recumandaziun dal president communal e deputà da Landquart *Sepp Föhn* a favur d'in credit impegnativ da 24,5 milliuns a favur da la renovaziun dal center d'agricultura e dietas al Plantahof. La renovaziun che preveda da remplazzar il convict, la sala da mangiar e la cuschina saja urgente e necessaria.

Plinavant prendan delegadas e delegads enconuschientscha che la su-prastanza da partida ha decidì la parola gea per il scumond da discriminaziun pervia da l'orientaziun sexuala.